

四庫全書

集部

欽定四庫全書

文忠集卷一百三十五

宋 歐陽修 撰

集古錄跋尾二

後漢堯母碑

歲月見本文

右漢堯母碑漢建寧五年造其文略曰堯母慶都感赤龍而生堯遂以侯伯恢踐帝下有闕慶都僊沒蓋葬于茲欲人莫知名曰靈臺上立黃屋堯所奉祠三代改易荒

廢不修漢受濡期興滅繼絕如堯為之遂遭亡新禮祠

絕矣故廷尉

姓名唐滅不可讀矣

深惟大漢堯之苗胄當修堯祠

追遠復舊前後奏上帝納其謀歲以春秋奉太牢祠時

濟陰太守魏郡審晃成陽令博陵管遵各遣大掾輔助

闕一字

若經之營之不日成之此其大概也按皇覽云堯

冢在濟陰城陽呂氏春秋云堯葬穀林皇甫謐曰穀林

即城陽然自史記地志及水經諸書無堯母葬處惟見

於此碑蓋亦葬城陽也而諸書俗本多為城陽獨此碑

為成陽當以碑為正碑後列當時人名氏又云審是字元讓管遵字君臺又云漢受濡期莫曉其義也

右集本

後漢堯祠碑

歲月見本文

右漢堯祠碑在濟陰碑云帝堯者蓋昔時之聖王也又曰聖漢龍興纂堯之緒祠以上犧至于王莽絕漢之業而壇場夷替屏懾真蹟一作懾無位大抵文字磨滅字雖可見而不復成文其後有云李樹連理生於堯祠太守河南張寵到官始初出錢二千敬致禮祠其餘不能一作可

讀也碑後有年月蓋熹平四年建也治平元年五月晦

日書 右真蹟

後漢堯祠祈雨碑 歲月見本文

右漢堯祠祈雨碑首尾殘滅其僅可識者有云股肱賢  
良廣祈多福虔虔夙夜又云常以甲子日詔太常陳上  
古之禮舞先王之樂又云延熹十年仲春二月陽氣侵  
陰又云享祀羣神仰瞻雲漢又曰嘉澍優霑利茂萬物  
又云孟府君知堯精靈與天通神修治大殿以此知為

祈雨於堯祠也堯祠在漢濟陰郡孟府君者當是濟陰  
郡太守也其餘隸字完者頗多亦往往成句但斷續不  
可次序耳

右集本

後漢老子銘

歲月見本文

右漢老子銘按桓帝本紀云延熹八年正月遣中常侍  
左悺之苦縣祠老子至十一月又遣中常侍管霸祠之  
而此碑云八月夢見老子而祠之世言碑銘蔡邕作今  
檢邕集無此文皆不可知也

右真蹟

後漢魯相置孔子廟卒史碑 歲月見本文

右漢魯相置孔子廟卒史碑云司徒臣雄司空臣戒稽  
首言魯前相瑛書言詔書崇聖道孔子作春秋制孝經  
演易繫辭經緯天地故特立廟寢成侯四時來祠事已  
即去廟有禮器無常人掌領請置百石卒史一人典主  
守廟謹問太常祠曹掾馮牟史郭玄辭對故事辟雍祠  
先聖太宰太祝各一人備爵太常丞監祠河南尹給牛  
羊豕大司農給米臣愚以為如瑛言可許臣雄臣戒愚

齷誠惶誠恐頓首頓首死罪死罪臣稽首以聞制曰可  
按漢書元嘉元年吳雄為司徒二年趙戒為司空即此  
云臣雄臣戒是也魯相瑛者據碑言姓乙字仲卿漢碑  
在者多磨滅此幸完可讀錄之以見漢制三公奏事如  
此與群臣上尚書者小異也又見漢祠孔子其禮如此  
治平元年六月二十日書 右真蹟

後漢修孔子廟器碑

一作表

歲月見本文

右漢

一有朝字

韓明府修孔子廟器碑云永壽二年青龍

二字

一作歲

在涪灘霜月之靈皇極之日永壽桓帝年號也按

爾雅云歲在申曰涪灘桓帝永興三年正月戊申大赦

改元永壽明年

一作歲次二字

丙申曰歲在涪灘是矣云霜月

之靈皇極之日莫曉其義疑是九月五日前漢文章之

盛庶幾三代之純深自建武以後頓爾衰薄崔蔡之徒

擅名當世然其筆力辭氣非出自然與夫揚馬之言醇

醜異味矣及其末也不勝其弊霜月皇極是何等語韓

明府者名勅字叔節前世見於史傳未有名勅者豈是

余學之不博乎春秋左氏傳載古人命名之說不以為  
名者頗多故以勅為名者少也治平元年二月晦日書  
右真蹟

後漢魯相晨孔子廟碑

歲月見本文

右漢魯相上尚書章其略云建寧二年三月癸卯朔七  
日己酉魯相臣晨長史臣謙頓首死罪上尚書臣晨頓  
首頓首死罪死罪臣以元年到官行秋饗飲酒泮宮復  
禮孔子宅而無公出酒脯之祠臣輒依社稷出王家穀

春秋行禮建寧靈帝年號也於此見漢制天子之尊其  
辭稱頓首死罪而不敢斥至尊因尚書以致達而已余  
家集錄漢碑頗多亦有奏章患其磨滅獨斯碑首尾完  
備可見當時之制也又云孔子乾坤所挺西狩獲麟為  
漢制作故孝經援神契曰玄丘制命帝外行又尚書考  
靈耀曰丘生倉際觸期稽度為赤制讖緯不經不待論  
而可知甚矣漢儒之狡陋也孔子作春秋豈區區為漢  
而已哉治平元年三月廿五日書

右真蹟

後漢碑陰題名

歲月未詳

右漢碑陰題名不知為何人碑余家集錄古文既多或失其所得之自然漢碑存於今者惟華嶽與孔子廟最多其陰徃徃列修廟人姓名并記其所出錢數不過三百至五百今斯碑所題文字缺滅而中間有錢各五百四字則似是修廟人所記其人可見者有濟陰定陶蔡顥子盛山陽金鄉張彥季德河南宛陵趙堂世萇南陽南鄉鄧升升遠濟陰成武周鳳季節而其餘人姓名邑

里多不完又時時有故吏字不知為何人祠廟第以漢  
隸難得錄之爾治平元年閏五月八日書

右真蹟

同前

右漢碑陰題名不知為何碑之陰蓋余家集錄既多而  
或失其所得之自漢碑文字磨滅不可考究惟有錢各  
五百四字似是漢時修廟人爾漢碑今在者惟華嶽與  
孔子廟中最多其碑陰題名者往往各書所出錢數不  
過三百五百也而此碑所列邑里姓名字完可見者尚

十餘人然皆是濟陰山陽彭城汝南陳留人則疑為修  
孔子廟人也今列于後覽者可以察焉濟陰定陶蔡顥  
子盛濟陰張翔季審陳留酸棗季真顯節山陽金鄉張  
諤季德河南宛陵趙堂世萇南陽南鄉鄧升升遠濟陰  
成武周鳳季節山陽昌邑田胤元尊濟陰成武史楞世  
明彭城朱翔元舉 右真蹟

同前

右漢碑陰題名二皆不知為何碑陰其人各記所出錢數

似是漢時修廟人題名余家集錄華嶽及孔子廟碑多如此此亦疑是二廟中碑前碑殘滅尤甚第時有門生濟南東郡等字而姓名無復完者後碑則有議曹功曹騎吏有蓮勺左鄉有秩池陽左鄉有秩池陽集丞有秩皆不知是何名號又有闕一字陽候長祿祠候長則是縣吏之名其隸字不甚精又無事實可考姑錄其名號以俟知者爾

右集本

後漢張公廟碑

歲月見本文

真蹟

右漢張公廟碑在黎陽而碑無題首又其文字殘滅不可考究莫知為何碑第時時得其字之可識而僅成文者曰惟和平元年正月丙寅和平桓帝年號以此知為漢碑也又曰豐碑廟堂之前又曰於穆張公則又知為張公廟碑矣又云國無災祲屢獲豐年作歌九章頌公德芳其辭有云公與守相駕蜚魚來往倏忽遠熹娛祐此兆民寧厥居其餘字畫尚完者甚多但不成文爾治平元年閏五月九日書是日奏事垂拱退召赴延和閣

謝契丹禮物遂歸休

後漢公昉碑

一作仙人唐君碑

歲月未詳

右漢公昉碑者乃漢中太守南陽郭芝為公昉修廟記也漢碑在今者類多磨滅而此記文字僅存可讀所謂公昉者初不載其姓名但云君字公昉爾又云耆老相傳以為王莽居攝二年君為郡吏啖瓜旁有真人一有居字左右莫察君獨進美瓜又從而敬禮之真人者遂與期谷口山上乃與君神藥曰服藥以後當移意萬里知鳥

獸言語是時府君去家七百餘里休謁往來轉景即至

闔郡驚焉白之府君徙為御史一作吏鼠齧被具君乃畫

地為獄召鼠誅之視其腹中果有被具府君欲從學道

頃無所進府君怒勅尉部吏收公昉妻子公昉呼其師

告以厄其師以藥飲公昉妻子曰可去矣妻子戀家不

忍去於是乃以藥塗屋柱飲牛馬六畜須臾有大風雲

來迎公昉妻子屋宅六畜脩然與之俱去其說如此可

以為怪矣嗚呼自聖人沒而異端起戰國秦漢以來一作

之際奇辭怪說紛然爭出不可勝數久而佛之徒來自西夷老之徒起於中國而二患交攻為吾儒者徃徃牽而從之其卓然不惑者僅能自守而已欲排其說而黜之常患乎力不足也如公昉之事以語愚人豎子皆知其妄矣不待有力而後能破其惑也然彼漢人乃刻之金石以傳後世其意惟恐後世之不信然後世之人未必不從而惑也治平元年四月二十三日以旱開宮寺祈雨五日中一日休務假書

右真蹟

後漢析里橋郟閣頌

歲月見本文

右漢析里橋郟閣頌建寧五年立云惟斯析里處漢之  
右溪源漂疾橫注於道涉秋霖漉稽滯商旅休謁往還  
常失日晷行理咨嗟郡縣所苦斯溪既然郟閣尤甚臨  
深長淵三百餘丈接木相連號為萬柱遭遇隕納人物  
俱墮一作隕沈沒洪淵酷烈為禍於是太守阿陽李君謹

會字伯都以建寧三年二月辛巳到官思惟惠利有以  
綏濟聞此為難其日久矣乃俾府掾仇審改解危殆即

便求隱析里大橋於爾乃造又醜散關之嶮深徙朝陽  
之平慘減西高閣就安寧之石道禹導江河以靖四海  
經紀厥續艾康萬里乃作頌曰頌後又有詩皆磨滅不  
完其云遭遇隕納又云醜散關之嶮深徙朝陽之平慘  
刻畫適完非其訛謬而莫詳其義疑當時人語與今異  
又疑漢人用字簡略假借不同爾故錄之以俟博識君  
子治平元年六月十日書

右真蹟

後漢人闕銘

歲月未詳

真蹟

右漢人闕銘二其一曰永樂少府賈君闕其一曰雒陽  
令王君闕二者皆不知為何人按漢書桓帝母孝崇  
皇后居永樂宮和平元年詔置太僕少府如長樂故事  
又按顏師古注地理志曰魚豢真蹟誤  
作豢云漢火行忌水  
故去洛水加佳師古謂光武以後始改為雒然則二人  
者皆後漢時人也又按漢官儀長樂少府以宦者為之  
則賈君者蓋亦宦者也治平元年九月十五日書

後漢文翁石柱記

歲月見本文

右漢文翁石柱記云漢初平五年倉龍甲戌旻天季月

修舊築周公禮殿始自文翁開建泮宮據顏有意益州

學館廟堂記云按一無此字華陽國志文翁為蜀郡守造講

堂作

一無此字

石室一名玉堂安帝永初間烈火為災堂及

寺舍並皆焚燎惟石室獨存至獻帝興平元年太守高

朕於玉堂東復造一石室為周公禮殿有意又謂獻帝

無初平五年當是興平

四字一作當如華陽志為興平

元年蓋時天下

喪亂西蜀僻遠年號不通故仍稱舊號也今檢范曄漢

書本紀初平五年正月改為興平顏說是也治平元年

六月十三日書

右真蹟

後漢文翁學生題名

右漢文翁學生題名凡一百有八人文學祭酒典學從事各一人司儀主事各二人左生七十三人右生三十人文翁在蜀教學之盛為漢稱首其弟子著籍者何止於此蓋其磨滅之餘所存者此爾治平元年六月二十

日書

右真蹟

後漢泰山都尉孔君碑

歲月見本文

右漢泰山都尉孔君碑云君諱宙字季將

二字一作秀特

孔子

十九世之孫也年六十一延熹四年正月乙未以疾卒

一有于家二字

其序官闕甚簡又或殘滅不完但見其舉孝廉

為郎遷元城令遂為泰山都尉爾其辭有云躬忠恕以  
及人兼禹湯之罪已宙人臣而引禹湯以為比在今人  
於文為不類蓋漢世近古簡質猶如此也治平元年閏

五月二十一日書

右真蹟

後漢孔宙碑陰題名

右漢孔宙碑陰題名漢世公卿多自教授聚徒常數百人其親受業者為弟子轉相傳授者為門生今宙碑殘缺其姓名邑里僅可見者纔六十二人其稱弟子者十人門生者四十三人故吏者八人故民者一人宙孔子十九世孫為泰山都尉自有錄治平元年閏五月二十

一日書

右真蹟

後漢孔君碑

歲月見本文 真蹟

右漢孔君碑其名字磨滅不可見而世次官闕粗可考  
云孔子十九代孫潁川君之元子也舉孝廉除郎中博  
昌長遭太守君憂服竟拜尚書侍郎治書御史博陵太  
守遷下邳相河東太守建寧四年十月卒其餘文字歷  
歷可讀以其斷絕處多文理難續故不復盡錄然其終  
始略可見矣惟其名字皆亡為可惜也治平元年五月  
十日書

後漢孔德讓碑

一作碣

歲月見本文

右漢孔德讓碑蓋其名已磨滅但云字德讓者宣尼公

二十世孫都尉君之子也仕歷郡諸曹史年二十永興

二年七月遭疾不祿碑在今兗州孔子墓林中永興孝

桓帝年號也

一有都尉者  
宿也五字

其人

二字一  
作德讓

早卒無事蹟可

考余集錄所藏

一有獨  
闕二字

孔林中漢

一無  
此字

碑最後得此遂

無遺者蓋以其文字簡少無事實故世人遺而不取獨

余家有之也治平元年閏五月二十日書

右真蹟

後漢劉寬碑

中平二年

右漢太尉車騎將軍特進遼鄉二字一作封昭烈侯劉公碑

公諱寬有兩碑皆在洛陽余家集錄皆得之其一故吏

李謙所一作等立而此碑門生殷包等所一無此字立其所書

與李謙等一作碑所載不異惟漢隸難得當錄二字一作故錄之

漢公卿一有卒字故吏門生各自立碑以伸感慕惟見於此

今人家碑碣非其子孫則他人不為立也治平元年六

月十四日書右真蹟

後漢太尉劉寬碑同前

右漢太尉劉寬碑漢書有傳其官闕始卒與碑多同而傳載遷官次序頗略蓋史之所記善惡大事官次雖小略不足為失惟其繆誤與闕其大節不可不正碑云大將軍以禮脅命拜侍御史遷梁令三府並用博士徵皆不就司隸校尉舉其有道公車徵拜議郎司徒長史而傳但云大將軍辟五遷司徒長史今據碑止四遷爾博士未嘗拜也碑於長史下遂云入登侍中延熹八年地震有詔詢異而拜尚書遷南陽太守拜太中大夫復拜

侍中屯騎尉宗正光祿勳遂授太尉傳至太中大夫始  
云遷侍中其前自長史入登侍中史闕書也碑又云固  
疾遜位拜光祿大夫遷衛尉復作太尉而傳云以日食  
免拜衛尉以日食免當從傳為正而不書光祿大夫史  
闕也其餘皆同故不復錄 右集本

後漢太尉劉寬碑陰題名

歲月見本文

右漢太尉劉寬碑陰題名寬碑有二其故吏門生各立  
其一也此題名在故吏所立之碑陰其別列於後者在

寬子松之碑陰也寬以漢中平二年卒至唐咸亨元年

其裔孫湖

一作胡

城公爽以碑歲久皆仆于野為再立之

并記其世序嗚呼前世士大夫世家著之譜牒故自中

平至咸亨四百餘年而爽能知其世次如此之詳也蓋

自黃帝以來子孫分國受姓歷堯舜三代數千歲間詩

書所紀皆

一有各字

有次序豈非譜繫源流傳之百世而

一無

此不絕歟此古人所以為重也不然則士生於世皆莫

自知其所出而昧其世德遠近其所以異於禽獸者僅

能識其父祖爾其可忽哉唐世譜牒尤備士大夫務以  
世家相高至其弊也或陷輕薄婚姻附託邀求貨賂君  
子患之然而士子修飭喜自樹立競競惟恐墜其世業  
亦以有譜牒而能知其世也今之譜學亡矣雖名臣巨  
族未嘗有家譜者然而俗習苟簡廢失者非一豈止家  
譜而已哉嘉祐八年七月二十九日書

右真蹟

後漢楊震碑

歲月未詳

右漢楊震碑首題云漢故太尉楊公神道碑銘文字殘

缺首尾不完其可見而僅成文者云聖漢龍興神祇降

祉乃生於公又云窮神知變與聖同符鴻漸衡

一作門

羣英雲集又曰貽我三魚以章懿德又云大將軍辟舉

茂材除襄城令遷荊州刺史東萊涿郡太守又云司徒

太尉立朝正色恪勤竭忠其餘字存者多而不復成文

矣治平元年六月十日書

右真蹟

後漢楊震碑陰題名

真蹟

右漢楊震碑陰題名者一百九十人其餘磨滅不完者

又十餘人余家所錄漢碑陰題名頗多或稱故吏門生  
弟子或稱從事曹掾之類其人皆著州縣邑里名字甚  
詳獨此碑所書簡略直云河間賈伯錡博陵劉顯祖之  
類凡百九十人者皆然疑其所書皆是字爾蓋後漢時  
人見於史傳者未嘗有名兩字者也漢隸世所難得幸  
而在者多殘缺不完獨此碑刻畫完具而穎法尤精妙  
甚可喜也治平元年中伏日書

後漢沛相楊君碑

歲月見本文 真蹟

右漢沛相楊君碑在閩鄉楊震墓側碑首尾不完失其  
名字按後漢書震及中子秉秉子賜賜子彪皆有傳又  
云震長子牧富波相牧孫竒侍中竒子亮陽成亭侯又  
云少子奉奉子敷敷子衆務亭侯又有彪子修楊氏子  
孫載於史傳者止此爾不知沛相為何人也碑云孝順  
皇帝西巡以掾史召見拜郎中遷常山長史換犍為府  
丞宰司累辟應於司徒州察茂才遷鮑陽侯相後拜議  
郎五官中郎將沛相年五十六建寧元年六月癸丑遘

疾而卒其終始尚可見而惜其名字亡矣治平元年六月十日書

後漢繁陽令楊君碑

熹平中

右漢繁陽令楊君碑首尾不完文字磨滅可識者四百三十字不可識者六十一字碑云君遭叔父太尉薨委榮輕舉吏民攀轅守闕上書運穀萬斛助官賑貧以乞君還又云一作君富波君之子按漢書楊震子牧為富波相君迺牧子也叔父太尉者秉也出米乞令前史所無

惜其名字磨滅不可見矣嘉祐八年十月廿三日書

右

真蹟

後漢高陽令楊君碑

歲月未詳

右漢高陽令楊著碑首尾不完而文字尚可識云司隸從事定潁侯相最後為善侯相善上一字磨滅不可見蓋其中間嘗為高陽令而碑首不書最後官者不詳其義也按楊震碑高陽令著震滌也今碑在震墓側

一有也字 真蹟

後漢楊君碑陰題名

真蹟

右漢楊君碑陰題名首尾不完今可見者四十餘人楊震子孫墓闋鄉者數世碑多殘缺此不知為何人碑陰其後有云右後公門生又云右沛

二字集本作後史

君門生沛

君疑是沛相者自有碑而亡其名字矣後公亦不知為何人也治平元年六月十日書

同前真蹟

右漢楊君碑陰題名凡一百三十一人有稱故吏者故

民者處士者故功曹史者故門下佐者類例不一似當時人各隨意書之而文字磨滅僅可讀其姓名皆俱完可識者八十三人其餘或在或亡蓋後漢楊震墓域中碑也楊氏墓在閭鄉有碑數片皆漢世所立余家集錄得其四震及沛相繁陽高陽令碑并得碑陰題名然一得時參錯不知為何碑之陰也其名氏可見者當時嚮皆無所稱述顧其人亦不足究考第以漢隸真蹟金石所傳者至今類多磨滅可惜故錄之爾治平元年三月

晦日書

後漢碑陰題名

右漢碑陰題名在闕鄉楊震墓側文字磨滅不復可考其僅可見者曰候長汾陰趙遺子宣候上滅一字又曰故督郵曹史縣功曹鄉部吏柏昱等人名鄉上又滅一字又曰西鄉亭長柏昱子政又曰鄉亭長翟國相如鄉上又滅一字又曰麟都亭長陰定安定谷口亭長方丈雅方上又滅一字東門亭長梁忠子孝四望亭長吳鴻

子名麟武亭長常高君宣其餘缺裂不完蓋楊氏子孫  
當時皆塋閩鄉碑碣往往磨滅此不知為誰碑也治平  
五年五月廿日謝雨致齋於太社書

右真蹟

後漢楊公碑陰題名

真蹟

右漢楊公碑陰題名楊氏世塋閩鄉墓側皆有碑今其  
存者四余家集錄皆得之乃太尉沛相高陽繁陽令也  
此碑陰者不知為何人碑文字殘缺其僅存者十五人  
又滅其一其在者十四人曰懷陵園令相蔣禧字武仲

宜祿長蕭劉瑞字仲祐孝廉杼秋劉旭字子明太官日

丞譙曹臻字建國辭曹史鄆公孫銀字山根門下書佐

史韓純字子敬豐畢珮字廣世鄆孟縱字河雒決曹書

佐鄆公孫暘字元暘皆稱故吏又有故吏一無贊陳俊二字

字仲顯蘄夏陽字儀公蘄兒銀字伯玉杼秋劉順字子

選沛周儀字帛民凡五人皆不著職一有但稱而孟縱故吏四字

字河雒周儀字帛民文字皆完非訛謬而莫曉其義也

治平元年六月十四日書

後漢殘碑陰

歲月未詳

右漢殘碑陰前後

二字一作亦

磨滅不知為何人碑其知為

漢碑者蓋其隸字非漢人莫能為也其字僅可見者尚數十而姓名完者九人曰王伯鄉趙仲方賈元周王景陽賈元輔宗石處王仲宣馬安國王通國皆無官號邑里莫知為何人惟漢隸在者少為難得故錄之治平元年五月十八日書

右真蹟

後漢朔方太守碑陰

歲月見本文

右漢朔方太守碑陰題名

一無此字

云永壽二年朔方太守

上郤仇君察察下減一字除郎中大曲長大下又減一

字延熹四年九月乙酉詔書遷衙令五年正月到官奉見

明府見下又減一字立祠刊石表章大聖之遺靈永示

來世之未

一作末

未下又減一字謹出錢千千下又減兩

字者下行因紀姓名

一無七字

據此乃當時修廟出錢人爾

今其姓名徃徃可見云衙鄉三老時勤伯秋上官鳳季

方錄事史楊禹孟布衙主記掾楊綬子長門下功曹裴

篤伯安倉曹掾任就子優又有集曹掾軍一作假司馬

之類名字多不完其所出錢不過三百至五百蓋漢世

物輕幣重今華嶽孔子廟碑陰所列亦皆如此其所立

祠蓋不知為何廟也治平元年夏至日書

右真蹟

後漢劉曜碑

一有並陰二字

歲月未詳

真蹟

右漢劉曜碑在今鄆州界中文字磨滅僅有存者云諱  
曜字季尼年七十三其餘爵里官闕卒葬歲月皆不可  
見字為漢隸亦不甚工惟其銘云天臨大漢錫以明哲

碑首題云漢故光祿勳東平無鹽劉府君之碑以此知為漢碑也治平元年四月一日書

後漢北海相景君銘

歲月見本文

右漢北海相景君銘其碑首題云漢故益州太守北海相景君銘其餘文字雖徃徃可讀而漫滅多不成文故君之名氏邑里官闕皆不可考

一作見

其可見者云惟漢

安二年北海相任城府君卒城下一字不可識當為景也漢功臣景丹封櫟陽侯傳子尚尚傳子苞苞傳子臨

以無嗣絕安帝永初中鄧太后紹封苞弟遽為監亭侯  
以續丹後自是而後史不復書而他景氏亦無顯者漢  
安順帝年號也君卒於順帝時蓋與遽同時人也碑銘  
有云不永麋壽余家集錄三代古器銘有云眉壽者皆  
為麋蓋古字簡少通用至漢猶然也治平元年四月二  
十九日書 右真蹟

後漢謁者景君碑

右漢景君碑尤磨滅惟謁者任城景君數字尚完其餘

班班可見者皆不能成文故其年世壽考功行卒墓莫可考也蓋漢隸今尤難得其磨滅之餘可惜爾

右真蹟

後漢景君石櫛銘

右景君石櫛銘者余既得前景君碑又得此銘皆在任城不知一景君乎將任城景氏之族多耶文字磨滅不可考故附於此熙寧三年正月朔旦山齋記

右真蹟

後漢袁良碑

歲月見本文

右漢袁良碑云君諱良字卿卿上一字磨滅陳國扶樂

人也厥先舜苗世為封君周興虞闕父自此而滅又云  
滿為陳侯至玄孫濤塗以字立姓曰袁自此又滅又云  
當秦之亂隱居河洛高祖破項實從其冊天下既定還  
宅扶樂蓋不知為何人也又云孝武征和三年曾孫斬  
賊先勇拜黃門郎曾孫滅其名賊下亦一作滅一字又  
曰封關內侯食遺鄉六百戶薨子經嗣經薨子山嗣傳  
國三世至王莽而絕君即山之曾孫也舉孝廉郎中謁  
者將作大匠丞相令廣陵大守討江賊張路等威震徐

方謝病歸家孝順初初下數字滅

一作滅  
數字

又云府舉君

拜議郎符節令其後又云永建六年二月卒其碑首題

云漢故國三老袁君碑而碑文有使者持節安車又有

几杖之尊袒割之養君實饗之之語以此知良嘗為三

老矣其餘磨滅雖時時可讀而不能次第也又云帝御

九龍殿引對飲宴九龍殿名惟見於此治平元年五月

二十九日夏至假書

右真蹟

後漢張平子墓銘

永和四年

右漢張平子墓銘世傳崔子玉撰並書按范曄漢書張

衡傳贊云崔子玉謂衡數術窮天地制作侔造化此銘

有之

四字一作今  
銘有此語

則真子玉作也其刻石為二本一在

南陽一在向城天聖中有右班殿直趙球者知南陽縣

事因治縣署毀馬臺得一石有文驗之廼斯銘也遂龕

於聽事之壁其文至凡百君子而止其後

一有半字

亡矣其

在向城者今尚書屯田員外郎謝景初得其半於向城

之野自凡百君子已上則亡矣

三字一作其  
前半亡矣

今以二本

相補續其文遂復完而闕其最後四字然則昔人為二本者不為無意矣據徐方回所記二十一字迺趙球所

得南陽石之亡者

二十一字一作唐寶應中有徐方回者別得二十一字云是銘最後文疑

球所得南陽石之半亡者爾

今不復見則又亡矣惜哉嘉祐八年歲

在癸卯十月十八日書

右真蹟

文忠集卷一百三十五

欽定四庫全書

文忠集卷一百三十六

宋 歐陽修 撰

集古錄跋尾三

後漢費鳳碑 歲月見本文

右漢費鳳碑云

集本有君諱鳳三字

字伯蕭梁相之元子也

集本無也

字漢安二年舉孝廉拜郎中除陳國新平長又云試守

故障長其文班班可見而卒葬年壽皆不載其後悉為

五言韻語其略曰不悟

集本作語

奄忽終藏形而匿景

集本作影

耕夫釋耒耜桑女投鉤管道阻而且長起坐淚如雨其

文既非工故不悉錄

八字集本作文字工拙古今皆然惟漢隸難得故錄爾

熙寧

二年十一月十六日山齋書

右真蹟

後漢武班碑

歲月見本文

右漢班碑者蓋其字畫殘滅不復成文其氏族州里官  
闕卒葬皆不可見其僅見者曰君諱班爾其首書云建  
元年太歲在丁亥而建下一字不可識以漢書考之後

漢自光武至獻帝以建名元者七謂建武建初建光建  
康建和建寧建安也以歷推之歲在丁亥乃章帝章和  
元年後六十一年桓帝即位之明年改本初二年為建  
和元年又歲在丁亥則此碑所缺一字當為和字

真蹟無此

六字廼建和元年也碑文缺滅者十八九惟亡者多而存  
者少尤為可惜也故錄之治平元年四月二十日書

右

集本

後得別本摹搨粗明始辨其一二云武君諱班乃易去

前本熙寧二年九月朔日記

後漢中常侍費亭侯曹騰碑

歲月見本文 真蹟

右漢中常侍費亭侯曹騰碑文字磨滅其粗可見者云  
維建和元年七月二十二日己巳皇帝若曰其遣費亭  
侯之國其餘不可識也建和桓帝即位之元年也後三

十七年獻帝中平元年騰養子操始為騎都尉

集本有領兵二

字擊黃巾矣治平元年六月十日書

後漢司隸楊君碑

歲月見本文

右漢司隸校尉楊厥碑云惟々靈定位川澤攸同澤有所注川有所通余谷之川其澤南隆八方所達益城為充高祖受命興於漢中道由子午出散入秦建定帝位以漢詆焉後以子午塗路澀難更隨園谷復通堂光凡此四道堦聶允艱至於永平其有四年詔書開余鑿通石門中遭元二西夷害殘橋梁斷絕子谷復循於是故司隸校尉犍為武陽楊厥字孟文深執忠伉數上奏請廢子由斯得其度經至建和二年漢中太守王升字稚紀

嘉君明知美其仁賢勒石頌德以明厥勲其辭大略如此其刻畫尚完可讀大抵述厥修復斜谷路爾但其用字簡省復多舛繆惟以崑為坤以余為斜漢人皆爾獨詆字未詳永平明帝建和桓帝年號也

右集本

後漢樊常侍碑

歲月見本文

右漢樊常侍碑云君諱安字子佑南陽湖陽人也君幼學治韓詩論語孝經歷中黃門拜小黃門小黃門右史遷藏府令中常侍年五十有六永壽四年四

石本作二月甲

辰卒其先為中黃門後為小黃門又為小黃門右史蓋

漢官之制今不詳其次序也余少家漢東天聖四年舉

進士赴尚書禮部道出湖陽

一本作間

見此碑立道左下馬

讀之徘徊碑下者久之後三十年始得而入集錄蓋初

不見錄於世自予集錄古文時人稍稍知為可貴自此

古碑漸見收采也

右集本

後漢郎中鄭固碑

固一本作宣

歲月見本文

集

右漢郎中鄭固碑文字磨滅其官閭卒葬年月皆莫可

考其僅可見者云君諱固字伯堅孝友著於閭門至行  
立乎鄉黨初受業於歐陽仕郡諸曹掾史主簿督郵五  
官掾功曹又曰忠以衛上清以自修其餘殘缺不復成  
文又云延熹元年二月詔拜而不見其官惟其碑首題  
云漢故郎中鄭君之碑以此知其官至郎中爾漢隸刻  
石存於今者少惟余以集錄之勤所得為獨多然類多  
殘缺一作減不完蓋其難得而可喜者其零落之餘尤為  
可惜也

延熹元年二月之下一本云詔拜郎中非其好也  
也以疾錮辭年四十二遭命殞身而中間又有

逡遁退讓之語道當作循錮當作固疑漢人用字多假借又疑以疾錮辭謂疾已堅固若云以疾篤辭覽者詳之

### 後漢田君碑

歲月見本文

真蹟

右漢田君碑今在沂州其名字皆已磨滅惟云其先出自帝舜之苗裔自完適齊因以為氏乃知為姓田爾又

云周秦之際家於東平陽君總角修韓詩京氏易

真蹟作易

京氏究洞神變窮奧極微為五官掾功曹州從事辟太尉

延熹二年辛亥詔書泰山瑯琊盜賊未息州郡吏有仁

惠公清撥煩整化者試守滿歲為真州言名時牧劉君  
知君宿操表上試守費自此以後殘缺不可次第而隱  
隱可見蓋無年壽卒葬月日而有故吏薛咸等立石勒  
銘之語乃費縣令長德政去思碑爾治平元年六月二  
十九日書

後漢孫叔敖碑

延熹三年

右漢孫叔敖碑云名饒字叔敖而史記不著其名而見  
於他書者亦皆曰叔敖而已微斯碑後世遂不復

知其名饒也此

集本無此字

碑世亦

集本作所

罕傳余以集錄二

十年間求之博且勤乃得之然則世之未見此碑者猶

不知為名饒也謂吾集古為無益可乎

集本無此九字

右真

蹟

### 後漢王元賞碑

歲月見本文

右漢王元賞碑云君諱某字元賞御史君之孫茂才君之子也歷秦及漢有國有家宰相牧守踵武相襲又曰遭父喪以孝立稱土堦環堵兼業並受門徒雨集盛於

洙泗又云郡察孝廉郎中謁者宛陵丞封丘令母憂去  
官服祥辟司空府延熹四年五月辛酉遭命而終其文  
字磨滅隱隱可見者如此其名既亡又不序其姓惟其  
銘云於惟王君以此知其姓王爾

右集本

後漢祝睦碑

歲月見本文 真蹟

右漢祝睦碑云君諱睦字元其下遂缺滅不能成文惟  
其官壽年月可見云賓於王庭除北海長史潁川鄆令  
辟司空府北軍中候拜大尚書尚書僕射遷常山相山

陽太守年六十有八延熹七年八月丁巳卒睦有二碑  
皆在今南京虞城縣此碑不見世次而隱隱有云其先  
高辛爾其後碑則頗完故錄於次也治平元年六月立  
秋日書

後漢祝睦後碑

延熹七年

右漢祝睦後碑其前碑不知所立人名氏兩碑所載官  
闕壽考年月悉同而此碑有立碑人名氏及睦世次云  
故吏王堂等竊聞下有述上之功臣有叙君之德又曰

君兆自黎辛祝融苗胄鄭有祝明君其肩也其餘文字亦完可讀二銘皆以三言為文而後銘尤完云穆我君邦之陽資五就闔道綱綱下滅一字表微準樞衡稽列宿覽四方德合乾道應皇領二郡曜重光化流洽緄幽昌性天約元用長頌聲作謠令香功烈著遺椒芳存覲榮淪弗忘其後二句磨滅難詳故錄其成文以見其雅質亦可嘉也治平元年六月立秋日書

右真蹟

後漢衡方碑

歲月見本文

右漢衡方碑云府君諱方字興祖其先伊尹在殷號稱  
阿衡因而氏焉又曰州舉孝廉除郎中即丘侯相膠東  
令州舉尤異遷會稽東部都尉又拜議郎北平太守遷  
潁川太守又曰拜步兵校尉年六十有三建寧元年二  
月五日癸丑卒於是海內門生故吏采嘉石樹靈碑鐫  
茂代祕將來此其始終之大略其餘歷歷可見而時亦  
磨滅以其文多不備錄也治平元年六月三日書

後漢冀州從事張表碑

歲月見本文 真蹟

右漢冀州從事張表碑云君諱表字元異其碑首題云漢故冀州從事張君碑而文為韻語叙其官閥不甚詳但云春秋六十四以建寧元年三月癸巳薨疾而終其

辭有云仕郡為督郵鷹撮盧擊是以狗喻人

集本有也字

又

有畔桓利正之語蓋漢人猶質不嫌取類於鷹犬畔桓

疑是盤桓

集本有漢時二字

文字簡少假借爾治平元年六月

廿九日書

後漢竹邑侯相張壽碑

歲月見本文

右漢竹邑侯相張壽碑云君諱壽字仲吾其先晉大夫

張老盛德之喬孝友恭懿明允篤信博物多識獵

一作略

涉傳說臨疑獨照確然不撓有孔甫之風舉孝廉除郎  
中給事謁者遷竹邑侯相年八十建寧元年五月辛酉  
卒其大略可見者如此其餘殘缺或在或亡亦班班可

讀爾

右集本

後漢金鄉守長侯君碑

歲月見本文 真蹟

右漢金鄉守長侯君碑云君諱成字伯盛山陽防東人

也其先出自幽岐周文之後封于鄭鄭共仲賜氏曰侯厥胤宣多以功佐國漢之興也侯公納策濟太上皇於鴻溝之阨謚曰安國君曾孫輔封明統侯光武中興玄孫霸為臨淮太守轉拜執法右刺姦五威司命大司徒公封於陵侯枝葉繁茂或家河涓或邑山濟君即上黨太守之弟郡請署主簿督郵五官掾功曹守金鄉長建寧二年四月癸酉卒年八十一碑文首尾皆完故得詳其世次其上黨太守不見其名按漢書執法左右刺

姦五威司命皆王莽官名侯霸列傳云霸莽時為隨令  
遷執法刺姦而未嘗為五威司命後事光武代伏湛為  
大司徒封關內侯既薨光武下詔追封則鄉侯而此碑  
言封於陵侯未知孰是據碑言刺姦司命為光武時官蓋  
碑文之繆矣治平元年四月二十九日書

後漢慎令劉君墓碑

建寧四年

右漢慎令劉君墓碑在今南京下邑其名已磨滅其字  
伯麟少罹艱苦身服田畝舉孝廉除郎中辟從事司徒

掾遷慎令卒年六十有二其銘曰於惟君德忠孝正直  
至行通洞高明柔克鬼神福謙受茲介福知命不延引  
輿旋歸忽然輕舉志激拔葵人皆有亡貴終譽兮歿而  
不朽垂名著兮余家漢碑常患其銘多缺滅而斯銘偶  
完故錄之

右真蹟

後漢北軍中侯郭君碑

歲月見本文

右漢北軍中侯郭君碑其名字磨滅云元城君第四子  
也其先蓋周之曹緒枝葉雲布列於州郡自東郡衛國

家於河內汲兄竹邑侯相次尚書侍郎次濟北相順弟  
臨沂長次徐州刺史次中山相次雒陽令君為五官掾  
功曹司隸中都官從事三辟將軍府舉廉比陽長復辟  
司徒拜北軍中侯年六十有六建寧四年九月丙子卒  
其於兄竹邑侯相上一字缺減不完疑是惠字其下又  
云順弟莫曉其義豈漢人謂兄弟為此語邪故闕其疑  
以候知者治平元年六月廿九日書

右真蹟

後漢司隸從事郭君碑

歲月見本文

右漢司隸從事郭君碑云君諱究汲人也元城君之孫  
雒陽令之適歷主簿督郵五官掾功曹守令長辟司隸  
從事部郡都官春秋二十八而卒中平元年歲在甲子  
三月而葬據北軍中侯碑為元城君子而弟為雒陽令  
考其世次皆同前世碑碣但書子孫而不及兄弟惟郭  
氏碑載其兄弟甚詳蓋古人譜牒既完而於碑碣又詳  
如此可見其以世家為重不若今人之苟簡也治平元  
年六月廿九日書

右真蹟

後漢魯峻碑

歲月見本文

集本

右漢魯峻碑云君諱峻字仲嚴山陽昌邑人監營謁者  
之孫修武令之子治魯詩顏氏春秋舉孝廉除郎中謁  
者河內太守丞辟司徒司空府舉高第御史東郡頓丘  
令遷九江太守拜議郎太尉長史御史中丞司隸校尉  
遭母憂自乞拜議郎服竟還拜屯騎校尉以病遜位熹  
平元年卒門生于商等二百三十人謚曰忠惠父其餘  
文字亦粗完故得遷拜次序頗詳以見漢官之制如此

惟云遭母憂自乞拜議郎又其最後為屯騎校尉而碑  
首題云漢故司隸校尉忠惠父魯君碑二者莫曉其義  
治平元年四月二十二日

後漢玄儒婁先生碑

歲月見本文

右漢玄儒婁先生碑云先生諱壽字九考南陽隆人也

祖太常博士父安貧守賤不可營

集本作榮

以祿先生童孩

多奇岐嶷有志好學不厭不飭小行善與人交久而能  
敬榮沮溺之偶耕甘山林之杳藹又曰有朋自遠冕紳

莘莘講習不倦年七十有八熹平三年二月甲子不祿  
今光化軍乾德縣圖經載此碑景祐中余自夷陵貶所  
再遷乾德令按圖求碑而壽有墓在穀城界中余率縣  
學生親拜其墓見此碑在墓側遂據圖經遷碑還縣立  
於勅書樓下至今在焉治平元年六月十三日書

右真

蹟

後漢郭先生碑

真蹟

歲月未詳

右漢郭先生碑云諱輔字輔成其先出於王季之中子

為文王卿士食采於號後世謂之郭歷戰國秦漢子孫  
流分來居荆土先生其少也孝友而悅學其長也寬舒  
如好施是以宗親歸懷鄉鄙高尚年五十有二遇疾而  
終其以而為如及用鄉鄙字與婁壽碑同蓋漢人如此  
爾治平元年六月二十日書

又  
集本

右不見書撰人名氏碑在襄州穀城縣界中其辭云先  
生諱輔字輔成其先出自有周王季之中子為文王卿

士食采於號至於武王錫而封之後世謂之郭春秋之  
時為晉所并歷戰國秦漢子孫派分來居荆土氏國立  
姓馬傳云聖賢之後必有達者先生應馬孝友而悅學  
其長也寬舒如好施是以宗親歸懷鄉鄙高尚年五十  
有二遇疾而終其文字古質蓋漢之碑也其用鄉鄙字  
與漢婁壽碑同其曰寬舒如好施蓋以如字為而也春  
秋書星隕如雨釋者曰如而也然施於文章以如為而  
始見於此也

後漢桂陽太守周府君紀功銘

熹平中

此君檢漢書無之今碑石缺不見其名惜乎遂不見於世也南人紀其所修瀧水即韓文公所謂昌樂瀧者是也至今以為利祠宇甚嚴云

右集本

後漢桂陽周府君碑

熹平中

右漢桂陽周府君碑按韶州圖經云後漢桂陽太守周府君碑按廟在樂昌縣西一百一十八里武溪上武溪驚湍激石沉數百里昔馬援南征其門人轅寄生善吹

笛援為作歌和之名曰武溪深其辭曰滔滔武溪一何  
深飛鳥不渡獸不能臨嗟哉武溪何毒淫周使君開此  
溪下合真水桂陽人便之為立廟刻石又云碑在廟中  
郭蒼文今碑文磨滅云府君字君光而名已訛缺不可  
辨圖經但云周使君亦不著其名後漢書又無傳遂不  
知為何人也按武水源出郴州臨武縣鸕鷀石南流三  
百里入桂陽面桂陽真水

一有梨  
溪二字

盧溪曹溪諸水皆與

武水合流其俗謂水湍峻為瀧韓退之詩云南下昌樂

瀧卽此水也碑首題云神漢者如唐人云聖唐爾蓋當時已為此語而史傳他書無之獨見於此碑也

右集本

後漢桂陽周府君碑後本

熹平中

右漢桂陽周府君碑余初得前本恨其名遂磨滅後有國子監直講劉仲章者因出其碑而為余言前為樂昌令因道府君事云名憬問其何以見之云碑刻雖闕尚可識也乃以此碑并陰遺余蓋前本特模者不工爾又余初以韓集云昌樂瀧疑其誤乃改從樂昌仲章曰不

然縣名樂昌而瀧名昌樂其舊俗所傳如是韓集不誤也乃知古人傳疑而慎於更改者以此

右集本

### 後漢費府君碑

歲月未詳 集本

右漢梁相費府君碑其名字若云諱況字仲慮而況疑為汎慮疑為寬其官閭可見者為蕭令九年沛有蝗獨不入其界國以狀聞朝廷嘉諸拜梁相春秋八十卒其銘頗簡而文字粗完云躄躄顯祖厥德懿鑠播勛於前不碩基業遺愛於民福流於後昨自此磨滅不可識者

八字其卒章云功烈休矣來昆戮力而穆字為𠄎古文  
多然

後漢郎中王君碑

光和元年

右漢郎中王君碑文字磨滅不復成文而僅有存者其  
名字官闕卒葬年月皆莫可考惟其碑首題云漢故郎  
中王君之銘知君為漢人姓王氏而官為郎中爾蓋夫  
有形之物必有時而弊是以君子之道無弊而其垂世  
者與天地而無窮顏回高臥於陋巷而名與舜禹同榮

是豈有託於物而後傳邪豈有為於事而後著邪故曰  
久而無弊者道隱而終顯者誠此君子之所貴也若漢  
王君者託有形之物欲垂無窮之名及其弊也金石何  
異乎瓦礫治平元年四月晦日書

後漢太尉陳球碑

歲月見本文

右漢太尉陳球碑云君諱球字伯真廣漢太守之元子  
也又云除郎中尚書符節郎慎陵園令換中東城門候  
遷繁陽令拜侍御史其後又云拜將作大匠其餘磨滅

僅存按後漢書球傳云父疊廣漢太守陽嘉中球舉孝廉稍遷繁陽令太尉楊秉表球零陵太守後累拜司空光和元年遷太尉坐日食免復拜光祿大夫與司徒劉郃等謀誅宦官曹節等不果下獄死球在零陵破賊胡蘭朱盖有功威著南邦今碑破蘭盖事班班可讀與傳皆合惟不著誅宦官事至其卒時文字磨滅不可識惟云六十有二亦與傳合予所集錄古文與史傳多異惟此碑所載與列傳同也治平元年四月晦日書

石真蹟

後漢敬仲碑

歲月見本文

右漢敬仲碑者其姓名字皆不可見惟其初有敬仲二字尚可識故以寓其名爾蓋疑其人姓田氏也大抵文字磨滅比其他漢碑尤甚字可識者頗多第不成文爾惟云州郡課最臨登大郡又云居喪致哀又云司隸從事治書侍御史又云光和四年閏月庚申此數句粗可讀爾其餘字畫厯完者以漢隸今為難得錄之爾治平元年閏五月廿九日書

右真蹟

後漢無名碑

此與前跋大槩同

右漢無名碑文字磨滅其姓氏名字皆不可見其僅可見者云州郡課最臨登大郡又云居喪致哀曾參閔損又曰辟司隸從事拜治書侍御史又曰奮乾剛之嚴威揚哮虎之武節又曰年六十三光和四年閏月庚申遭疾而卒其餘字畫尚完者多但不能成文爾夫好古之士所藏之物未必皆一作能適世之用惟其埋沒零落之餘尤以為可惜此好古之僻也治平元年六月五日書

右真蹟

後漢橐長蔡君頌碑

光和四年

真蹟

右漢橐長蔡君頌碑在鎮府故天章閣待制楊旼嘗為  
余言漢時隸書在者此為最佳旼自言平生惟學此字  
余不甚識隸書因旼言遽遣人之常山求得之遂入於  
錄

後漢唐君碑

歲月見本文

右漢唐君碑其名已磨滅其字正南云

集本作云  
字正南

潁川

鄆人也其先出自慶都感赤龍生堯王有天下苗胄枝  
分相土視居因氏唐馬君父孝廉郎中早卒君繼厥緒  
耽道好古敦書味詩守舞陽丞潁陽令察能治劇遷豫  
章其後遂復磨滅雖文字班班可見而不能得其次序  
其後又云換君昌陽令吏民慕戀牽君車輪不得行君  
臣流涕道路琅玕是故從事郡掾刊石樹頌歌君之美  
據此蓋縣令去思碑爾其後又云光和六年二月壬午  
朔二十五日丙午則知唐君為後漢時人矣治平元年

閏五月二十八日

右真蹟

後漢朱龜碑

歲月見本文

右漢朱龜碑云字伯靈察孝廉除郎中尚書侍郎以將  
事去官于時幽州州下滅一字夷侵寇以君為御史中  
丞討伐其後磨滅又云鮮卑侵犯障塞復舉君拜幽州  
刺史年六十四光和六年卒龜之事迹不見史傳其僅  
見於此碑者如此碑在今亳州界中云將事去官莫曉  
其語治平元年六月十四日書

右真蹟

後余守亳州徙碑置州學中

後漢小黃門譙君碑

歲月見本文

右漢小黃門譙君碑云君諱敏字漢達年五十七中平二年卒其文字不甚磨滅而官闕無所稱述惟云肅將王命守靜韜光以遠悔咎而已後漢官者用事靈帝時尤盛敏卒之歲張讓等十二人封侯於斯之時能守靜遠悔是亦可嘉然敏以小黃門而立碑稱頌於此可見宦官之盛也治平元年四月三日書

右真蹟

後漢熊君碑

歲月見本文

右漢熊君碑云君諱喬字舉舉上減一字其官闕不可  
詳考其僅可知者劉表時為綏民校尉後遷騎都尉建  
安二十一年卒享壽七十有一其云治歐羊尚書其字  
非訛闕而以陽為羊蓋古文字少故須假借至漢字已  
備而猶假用何哉後云太歲在申申上減一字以歷推  
之當是丙申又云碑師春陵福造福上減一字當是其  
姓其書顯字皆為顯按許慎說文顯從晷聲而轉為累

其失遠矣莫曉其義也

右集本

後漢俞鄉侯季子碑

歲月未詳

右漢俞鄉侯季子碑云君諱熊字孟下闕一字廣陵海西人也厥祖天皇帝垂精接感篤生聖明子孫享之分源而流枝葉扶疎出王別胤受爵列土封侯載德君光武皇帝之玄廣陵王之孫俞鄉侯之季子也由是而後文字缺滅其稍稍可讀者時得其一二云六籍五典如源如泉既練州郡卷舒委隨化流南城政猶北辰三

祀有成來臻我邦仁恩如冬日威猛烈夏日吏民愛若  
慈父畏如神明其後又云採摭謠言作詩三章據碑文  
無卒葬年月而其辭若此似是德政碑按後漢書光武  
皇帝子曰廣陵思王荆荆子元壽等四人皆封鄉侯史  
略而不載其名俞鄉侯者不知為誰也思王荆之弟幾  
子也天皇帝之語自漢以來有矣

右集本

後漢武榮碑

歲月未詳

右漢武榮碑云君諱榮字舍

集本作舍

和治魯詩經韋君章

句孝經論語漢書史記左氏國語為州書佐郡曹史

集本

作文

主簿督郵五官掾功曹年三十六南蔡府君察舉

孝廉執金吾丞孝桓大憂屯守玄武闕加遇害氣遭疾  
殞靈其餘文字殘缺不見其卒葬年月又不著氏族所  
出惟其碑首題云漢故執金吾丞武君之碑云治平元  
年五月六日書

右真蹟

後漢秦君碑首

歲月見本文

漢碑今存者少此篆亦與今文小異勢力勁健可愛

蔡君謨題

右漢熹平中碑在南陽界中字已摩

或作  
磨非

滅不可識獨

其碑首字大僅存其筆畫頗奇偉蔡君謨甚愛之此君謨過南都所題乃皇祐三年也今一紀矣嘉祐八年九

月十七日書

右真蹟

又此集本與真蹟頗不同故兩存之

右漢秦君碑首題云漢故南陽太守秦君之碑秦君不知為何人碑在南陽界中字已磨滅不可識獨其碑首

字大僅存其筆畫頗奇偉蔡君謨甚愛之

後漢元節碑

歲月未詳

右漢元節碑文字磨滅不見其氏族其可見者纔數十

字爾云君

集本無此字

諱立字元節其先出自伊尹其餘不

復成文其銘云於穆從事疑其姓伊而為從事也碑無年月而知為漢人者以其隸體與他漢碑同爾治平元年五月三日書

右真蹟

後漢殘碑

歲月未詳

真蹟

右漢殘碑不知為何人所存者纔三十二字不復成文  
惟云高字勿知其名高又云漢一有中字興復知為後漢時人  
而隸字在者甚完體質淳勁非漢人莫能為也故錄之

後漢天祿辟邪字

歲月未詳

右漢天祿辟邪四字在宗資墓前石獸膊上按後漢書  
宗資南陽安衆人也今墓在鄧州南陽界中墓前有二  
石獸刻其膊上一曰天祿一曰辟邪余自天聖中舉進  
士往來穰集本作襄鄧間見之道側迨今三十餘年矣其後

集錄古文思得此字屢求於人不能致尚書職方員外

郎謝景初家於鄧為余摹得之然字畫

集本作或

訛缺不若

余見時完也按黨錮傳云資祖均自有傳今後漢書有

宋均傳云南陽安衆人而無宗均傳疑黨錮傳轉

集本無此

字

寫宋為宗爾蜀志有宗預南陽安衆人豈安衆當漢

時有宗宋二族而字與音皆相近遂至訛謬邪史之失傳如此者多矣嘉祐八年臘日書

文忠集卷一百三十六

欽定四庫全書

集部

文忠集卷一百三十九至

詳校官庶吉士臣范逢恩

檢討臣何思鈞覆勘

總校官降調編修臣倉聖脈

校對官中書臣宋枋遠

謄錄監生臣許溶

欽定四庫全書

文忠集卷一百三十七

宋 歐陽修 撰

集古錄跋尾四

魏受禪碑 歲月見本文

右魏受禪碑世傳為梁鵠書而顏真卿又以為鍾繇書  
莫知孰是按漢獻帝紀延康元年十月乙卯皇帝遜位  
魏王稱天子又 集本無此字 按魏志是歲十一月葬士卒死

亡者猶稱

集本有正字

令是月丙午

集本作寅

漢帝使張愔奉璽

綬庚午王升壇受禪又是月癸酉奉漢帝為山陽公而

此碑云十月辛未受禪於漢三家之說皆不同今據裴

松之注魏志備列漢魏禪代詔冊書令羣臣奏議甚詳

蓋漢實以十月乙卯策詔魏王使張愔奉璽綬而魏王

辭讓往返三四而後受也又據侍中劉廙奏問大史令

許芝今月十七日巳未可治壇場又據尚書令桓階等

奏云輒下太史令擇元辰今月二十九日可登壇受命

蓋自十七日巳未至二十九日正得辛未以此推之漢  
魏二紀皆繆而獨此碑為是也漢紀乙卯遜位者書其  
初命而畧其辭讓往返遂失其實爾魏志十一月癸卯  
猶令者當是十月衍一字爾丙午張愔奉璽綬者辭讓  
往反容集本  
作殆有之也惟庚午升壇最為繆爾癸卯去癸  
酉三十一日不得同為十一月此尤繆也禪代大事也  
而二紀所書如此則史官之失以惑後世者可勝道哉

嘉祐八年九月十七日書

右真蹟

魏公卿上尊號表 黃初元年

右魏公卿上尊號表唐賢多傳為梁鵠書今人或謂非鵠也乃鍾繇書爾未知孰是也嗚呼漢魏之事讀其書者可為之流涕也其鉅碑偉字其意惟恐傳之不遠也豈以後世為可欺歟不然不知耻者無所不為乎 右真

蹟

魏鍾繇表 歲月見本文

右鍾繇法帖 一字集本作表者曹公破雲長賀捷表也其後書

云建安二十四年閏月九日南蕃東武亭侯鍾繇上集  
賢校理孫思恭精於歷學余問孫君建安二十四年閏  
在何月思恭為余以漢家所用四分乾象歷推之是  
歲己亥二歷皆閏十月而陳壽三國志所書時月雖為  
簡畧然以思恭言考之則合按魏志是歲冬十月軍還  
洛陽其下遂書孫權請攻雲長自効於吳志則書閏月  
權攻雲長以魏吳二志參較是閏十月矣吳志又書十二  
月獲雲長及其子平魏志明年正月乃書傳雲長首至

洛陽蓋二志相符乃權以閏十月攻雲長至十二月獲之明年正月始傳首至洛理可不疑然則鍾繇安得於閏十月先賀捷也由是此表可疑為非真而今世盛行復有兩本字大小不同小字差類繇書然不知其果是否姑並存之以俟識者治平元年七月廿六日書

右真蹟

又集本

右魏鍾繇書其辭云戎路兼行履險冒寒因述曹仁徐

晃破雲長事其後題云建安二十四年閏月九日南蕃  
東武亭侯臣繇上按建安二十四年冬曹公軍于摩陂  
仁等破雲長後未嘗出征履險冒寒之役又古人牋啓  
不書年此二事可疑又云雲長被手刃據三國志雲長  
圍仁於樊為仁所敗而走後為孫權兵斬於沮與此帖  
不同

魏劉熹學生冢碑

歲月未詳

右魏劉熹學生冢碑在襄州穀城縣界中余為乾德令

時嘗以公事過穀城見數荒冢在草間傍有古碑傾側半埋土中間其村人為何人冢皆不能道而碑文磨滅不暇讀而去後數年在河北始集錄古文思嚮所見穀城碑疑為漢碑求之又數年乃獲按襄州圖經云學生冢在縣東北水經注云魏濟南劉熹字德怡博學好古立碑載生徒百餘人其不終業而卒者葬于集本此號一作於學生冢今碑雖殘缺而熹與生徒名字往往尚可見蓋余昔所見乃學生冢而碑魏時碑也熹穀城令也治平

元年正月十日書 右真蹟

魏賈逵碑

歲月未詳

右魏賈逵碑魏志逵傳云逵為絳邑長為賊郭援所攻絳人與援約不害逵乃降而援欲以逵為將怒逵不肯叩

頭欲殺之絳人乘城呼曰負

集本作若

要殺我賢君寧俱死

援義之遂不殺又按裴松之注引魏畧云援捕得逵怒不肯拜促斬之諸將覆護囚於壺關土窖中守者祝公

道釋其械而逸之

集本有巴字

與魏志不同而此碑但云為

援所執臨以白刃不屈而已不載絳人約援事如傳所載不獨達有德於絳人而絳人臨危能與達生死亦可謂賢矣自古碑碣稱述功德常患過實如達與絳人德

義

集本有  
俱陸字

碑不應畧而不著頗疑陳壽作傳

集本無  
此二字

好

奇而所得非實也松之又注魏書達年五十五而碑云五十有四亦當以碑為正嘉祐八年十一月十四日書

右真蹟

魏鄧乂碑

歲月未詳

右鄧艾碑考其事蹟終始即魏集本無此字鄧艾碑也艾嘗

為兖州刺史據碑云晉初嘗發兖州兵討叛羗艾降巫  
者傳言授以用兵之法因以破羗兖人神之遂為艾立  
廟建碑紀其事艾於三國時為名將嘗有大功其姓名  
聞於世甚顯史與兖人皆不應誤而艾又二名不同如  
此此君子所以慎於傳疑也余謂古人艾又常通用漢  
書曰黎民艾安與懲艾創艾注皆讀為艾豈非鄧侯名  
艾音艾而書碑者從之歟後人讀史無音注乃且以為

蒿艾之艾而流俗轉失久而訛繆遂不復正此理或然  
覽者詳之熙寧壬子正月晦日六一堂書

右真蹟

吳九真太守谷府君碑

鳳皇九年四月

右谷朗者事吳為九真太守碑無書撰人名氏其序云  
府君諱朗字義先桂陽耒陽人豫章府君之曾孫公府  
君之孫朗中君之子也其先出自顓頊益為舜虞賜姓  
嬴氏至於邳子封於秦谷因而氏焉谷氏在吳不顯史  
傳無所見所謂豫章府君而下三世皆莫知其名字按

秦本紀非子邑於秦而此與朗子永寧侯相碑皆為靡  
子莫詳其義也治平元年四月二十六日書

右真蹟

吳國山碑

歲月見本文

右吳國山碑者孫皓天冊元年禪于國山改元天璽因  
紀其所獲瑞物刊石于山陰是歲晉咸寧元年後五年  
晉遂滅吳以皓昏虐其國將亡而衆瑞並出不可勝數  
後世之言祥瑞者可以鑒矣熙寧元年中元後一日書

右真蹟

晉南鄉太守頌

秦始皇中

右南鄉太守司馬整

集本作南鄉太守頌者南鄉太守者司馬整也

按晉書宣

帝弟曰安平獻王孚孚次子曰義陽成王望望第三子

曰隨穆王整整先望卒後武帝分義陽之隨縣封整為

王諡曰穆整整以魏咸熙二年為南鄉太守是歲晉武受

禪改元泰始泰始三年徙整南陽而南鄉人為整建此

碑晉書地理志當魏末荊州分屬三國而南鄉南陽皆

屬魏後晉武改南鄉為順陽此碑今在光化軍軍即襄

州穀城縣之陰城鎮陰城當魏晉時為南鄉屬縣也余  
賤乾德縣令時得此碑今二紀矣嘉祐八年九月二十  
六日書 右真蹟

晉南鄉太守碑 秦始皇四年

右南鄉太守碑不著書撰人名氏題曰宣威將軍南鄉  
太守司馬府君紀德頌碑云君諱整字孔修太宰安平  
王之孫太尉義陽王之子按晉書宣帝弟曰安平獻王  
孚孚次子曰義陽成王望望第三子隨穆王整整先望

卒後武帝分義陽之隨縣封整為王諡曰穆整以泰始三年自南鄉太守徙南陽而南鄉人共立此碑今在光化軍軍即襄州穀城縣之陰城鎮按晉志不列南鄉郡據此碑所載縣令名氏有武陵築陽丹水陰城順陽析六縣此蓋南鄉郡所治也晉志但云南鄉魏時屬荊州武帝平吳改為順陽郡而不著順陽治所興廢屬縣之名而獨此碑可見也又整傳但云整歷南中郎將封清泉侯薨贈冠軍將軍亦不言其為宣威將軍南鄉南陽

二郡守皆其所漏畧也

右集本

南鄉太守碑陰集本

右南鄉太守將吏三百五十人分為二卷其磨滅者猶有二十餘人人皆有邑姓名字而無次序其名號有令有長有南閣祭酒門下督主簿部督郵監汀督郵部勸農五官掾文學掾營軍掾軍謀掾府門亭長主記史侍事掾待事史部曲將部曲督又有賊曹功曹議曹戶曹金曹水曹科曹倉曹鎧曹左右兵曹曹皆有掾又有祭酒有史

有書佐有修行有徙掾位有從史位有史有小史等魏  
晉之際太守官屬之制蓋如此他書或時見一二不能  
如此之備也

晉陸喈碑

歲月見本文

右晉陸喈碑喈為宣威內史建武元年卒碑以咸和七  
年立而碑後題云咸和七年歲在庚辰咸和成帝年號  
也成帝以泰寧三年八月即位是歲乙酉明年改元咸  
和據歷七年當為壬辰而此為

集本  
作云

庚辰者繆也陸氏

有二碑余家集錄皆有之據陸禕碑後題云泰寧三年  
歲在乙酉與今歷合則當時歷官不應至咸和而頓爾  
差失然則庚辰特書碑者誤爾治平元年六月二十九  
日書 右真蹟

晉蘭亭修禊序

永和九年

集本

右蘭亭修禊序世所傳本尤多而皆不同蓋唐數家所  
臨也其轉相傳摸失真彌遠然時時猶有可喜處豈其  
筆法或得其一二邪想其真蹟宜如何也哉世言真本

葬在昭陵唐末之亂昭陵為溫韜所發其所藏書畫皆  
剔取其裝軸金玉而棄之於是魏晉以來諸賢墨蹟遂  
復流落於人間太宗皇帝時購募所得集以為十卷俾  
模傳之數以分賜近臣今公卿家所有法帖是也然獨  
蘭亭真本亡矣故不得列於法帖以傳今予所得皆人  
家舊所藏者雖筆畫不同聊並列之以見其各有所得  
至於真偽優劣覽者當自擇焉其前本流俗所傳不記  
其所得其二得於殿中丞王廣淵其三得於故相王沂

公家又有別本在定州民家二家各自有石較其本纖  
毫不異故不復錄其四得於三司蔡給事君謨世所傳  
本不出乎此其或尚有所未傳更俟博采

范文度模本蘭亭序

附

余嘗集錄前世遺文數千篇因得悉覽諸賢筆蹟比不  
識書遂稍通其學然則人之於學其可不勉哉今老矣  
目昏手顫雖不能揮翰而開卷臨几便別精麤若范君  
所書在余集錄實為難得也竊幸覽之

一作馬

為之忘倦

嘉祐七年夏五月二十八日廬陵歐陽修書

右真蹟

書雖列於六藝非如百工之藝也蔡君謨以書名當世其稱范君者如此不為誤矣滌山醉翁題

右真蹟

又

自唐末干戈之亂儒學文章掃地而盡宋興百年之間雄文碩儒比肩而出獨字學久而不振未能比蹤唐之一無人此字字人余每以為恨今乃獲見范君筆法信乎時不乏人而患知之不博不然有於中必形於外若范君者筆

迹不傳於世而獨傳其家蓋潛光晦德非止其書閱不

傳也

右真蹟

又與前跋相類疑是摹本今兩存之

自唐末兵戈之亂儒學文章掃地而盡聖宋興百餘年  
間雄文碩學之士相繼不絕文章之盛遂追三代之隆  
獨字書之法寂寞不振未能比蹤唐室余每以為恨今  
迺獲見范君之書信乎時不乏人而患聞見之不博也  
然范君之筆法宜傳於世久閱於家蓋其潛光晦德非

獨其書之閱也

右集本

晉樂毅論

永和四年

右晉樂毅論石在故高紳學士家紳死家人初不知惜好事者往往就閱或摹傳其本其家遂祕藏之漸為難得後其子弟以其石質錢於富人而富人家失火遂焚其石今無復有本矣益為可惜也後有

集本有此二字

甚妙二

字吾亡友聖俞書也論與文選所載時時不同考其文

理此本為是惜其不完也

右真蹟

晉王獻之法帖

歲月未詳 真蹟

右王獻之法帖予嘗喜覽魏晉以來筆墨遺蹟而想前人之高致也所謂法帖者其事率皆弔哀候病叙睽離通訊問施於家人朋友之間不過數行而已蓋其初非用意而逸筆餘興淋漓揮灑或妍或醜百態橫生披卷發函爛然在目使人驟見驚絕徐而視之其意態

集本無此

三

愈無窮盡故使後世得之以為奇翫而想見其人也

至於高文大冊何嘗用此而今人不然至或棄百事弊

精疲力以學書為事業用此終老而窮年者是真可突也治平甲辰秋社日書

又

獻之帖蓋唐人所臨其筆法類顏魯公更俟識者辨之  
右真蹟

晉賢法帖 真蹟

右晉賢法帖太宗皇帝萬幾之餘留情翰墨嘗詔天下  
購募鍾王真蹟集為法帖十卷摹刻以賜羣臣往時故

相劉公沆在長沙以官法鏤版遂布於人間後有尚書  
郎潘師旦者又擇其尤妙者別為卷第與劉氏本並行  
至余集錄古文不敢輒以官本參入私集遂於師旦所  
傳又取其尤者散入錄中俾夫啓帙披卷者時一得之  
把翫欣然所以忘勦也治平元年五月十日書

晉七賢帖

右晉七賢帖得之李丕緒少卿

真蹟無此二字

家丕緒多藏古

書然不知此為真否七子書蹟世罕傳故錄之

右集本

宋文帝神道碑

歲月未詳

右宋文帝神道碑云太祖文皇帝之神道凡八大字而別無文辭惟以此為表識爾古人刻碑一作碑刻正當如此

而後世鐫刻功德爵里世系惟恐不詳然自後漢以來門生故吏多相與立碑頌德矣余家集古所錄三代以來鍾鼎彝盤銘刻備有至後漢以後始有碑文欲求前漢時碑碣卒不可得是則冢墓碑自後漢以來始有也此碑無文疑非宋世立蓋自漢以來碑文務載世德宋

氏子孫未必能超然獨見復古簡質又南朝士人氣尚  
卑弱字書工者率以纖勁清媚為佳未有偉然巨筆如  
此者益疑後世所書按宋書文帝為元兇劬所弑初謚  
曰景廟號中宗孝武立改謚曰文號太祖其墓曰長寧  
陵也

右真蹟

宋宗慈母夫人墓誌

歲月見本文

右宗慈母夫人墓誌不著書撰人名氏有誌無銘其後  
云謹牒子孫男女次第名位婚嫁如左蓋一時之制也

按慤本傳與此誌歷官終始不同本傳云宋孝武即位以慤為左衛將軍累遷豫州刺史監五州諸軍使討竟陵王誕入為左衛將軍廢帝即位為寧蠻校尉雍州刺史卒此誌乃大明六年作誌云為右衛將軍監交廣二州湘州之始興冠軍將軍平越中郎將廣州刺史始遷豫州監五州軍事又為散騎常侍左衛將軍領太子中庶子荊州大中正而傳皆畧之也慤南陽涅陽人而此誌云涅陽縣都鄉安眾里人又云寔於秣陵縣都鄉石

泉里都鄉之制前史不載

右集本

齊鎮國大銘像碑

天統三年

集本

右齊鎮國大銘像碑銘像文辭固無足取所以錄之者  
欲知愚民當夷狄亂華之際事佛尤篤爾其字畫頗異  
雖為訛認亦其傳習時有與今不同者其錄之亦以此  
也

南齊海陵王墓銘

歲月未詳

右南齊海陵王墓銘長兼中書侍郎謝朓撰海陵王昭

文者文惠太子次子也初明帝鸞既廢鬱林王昭業而立昭文又廢為海陵王而殺之遂自立按謝朓傳朓當海陵王時為驃騎諮議領記室又掌中書郎後遷尚書吏部郎此誌題云長兼中書侍郎而據傳朓未嘗為中書侍郎史之闕也按南齊書劉俊為長兼侍中後魏臨淮王彧為長兼御史中尉南北史多有此名蓋

集本有長兼者

三當時兼官之稱如唐檢校官之類也嘉祐八年九月

十七日書 右真蹟

梁智藏法師碑

普通三年 真蹟

右梁智藏法師碑梁湘東王蕭繹撰銘新安太守蕭幾  
作叙尚書殿中郎蕭挹書世號三蕭碑法師者姓顧氏  
幾挹皆稱弟子衰世之弊遂至於斯余於集古錄而不  
忍遽棄者以其字畫集本粗可嘉捨其所短取其長  
斯可矣嘉祐八年五月晦日書

陳張慧湛墓誌銘

貞觀二十三年

右陳張慧湛墓誌銘不著書撰人名氏陳隋之間字書

之法幾於精妙而文章頽壞至於鄙俚豈其時俗弊薄  
士遺其本而逐其末乎予家集錄所見頗多自開皇仁  
壽而後至唐高宗已前碑碣所刻往往不減歐虞而多  
不著名氏如鉗耳君清德頌或有名而其人顯如丁  
道護之類不可勝數也慧湛陳人至唐太宗時始改葬  
爾其銘刻字畫道勁有法翫之忘勌惜乎不知為何人  
書也治平元年四月晦日書

右真蹟

陳浮屠智永書千字文

歲月未詳

右千字文今流俗多傳此本為浮屠智永書考其字畫  
時時有筆法不類者雜於其間疑其石有亡缺後人妄  
補足之雖識者覽之可以自擇然終汨其真遂去其二  
百六十五字其文既無所取而世復多有所嘉者字爾  
故輒去其偽者不以文不足為嫌也蔡君謨今世知書  
者猶云未能盡去也嘉祐八年十月十八日書 右真蹟

又

梁書言武帝得王羲之所書千字命周興嗣以韻次之

今官

集本作觀

法帖有漢章帝所書百餘字其言有海鹹河

淡之類蓋前世學書者多為此語不獨始於羲之也右

真蹟

大代修華嶽廟碑

歲月見本文

右大代修華嶽廟碑按魏書文成帝興光二年三月已

亥改元為太安故魏書興光無二年而此碑云

集本有興光二

字

二年三月甲午立者蓋立碑後六日始改元也其曰

闡皇風於五葉者自道武明元太武至於文成纔四世

爾太武之弒南安王余立不踰年亦被弒不得成君

集本

無此十而景穆太子文成父也追尊為帝立廟稱宗故

九字

以為世也魏自道武天興元年議定國號羣臣欲稱代而道武不許乃仍稱魏自是之後無改國稱代之事今魏碑數數有之碑石當時所刻不應妄但史失其事爾由是言之史家闕繆可勝道哉然予於史家非長故書之以待博學君子也嘉祐八年歲在癸卯七月三十日

書

昔在南譙自號醉翁晚又更號六一居士右真蹟

又

按魏書文成帝興光二年三月己亥改元太安而此碑書二年三月甲午立蓋立碑後六日乃改元故碑猶得稱二年也其曰闡皇風於五葉者自道武明元太武至於文成纔四世爾太武之弑南安王余立不踰年亦被弑不得成君為一世而景穆太子文成父也追尊為帝立廟稱恭宗故以為世也魏自道武天興元年議定國號羣臣欲稱代而道武不許乃稱魏自是之後無改國

稱代之事今魏碑數數有之碑石當時所刻不應妄誤但  
史失其事爾由是言之史家闕繆多矣 右真蹟

後魏孝文北巡碑

歲月見本文

右魏孝文北巡碑云太和二十一年修省方之典北臨  
舊京又云涉西河出平陽斜順唐逵指遊咸櫟路迺龍  
門遂紆雕軒按後魏本紀是歲正月乙巳北巡二月次  
太原至平城四月幸龍門以太牢祭夏禹遂幸長安汎  
涓浮河迺東歸與此碑所書皆合也碑無題首故依本

紀為北巡碑也治平元年三月廿二日書

右真蹟

後魏定鼎碑

歲月見本文

右魏定鼎碑景明三年建在今懷州流俗謂之定鼎碑也景明魏宣武年號也碑云定鼎遷中之十年按魏孝文以太和十七年遷都洛陽至此景明三年蓋十年矣

右集本

後魏石門銘

歲月見本文

右魏石門銘云此門蓋漢永平中所穿自晉氏南遷斯

路廢矣皇魏正始元年漢中獻地褒斜遂開假節龍驤  
將軍梁秦二州刺史羊祠開創舊路詔遣左校令賈三  
德共成其事起四年十月訖永平二年正月畢功其餘  
文字尚完而其大畧如此石門在漢中所謂漢永平中  
所穿者乃明帝時司隸校尉楊厥所開也厥自有碑述  
其事甚詳正始永平皆後魏宣武年號也治平元年五  
月十日書

右真蹟

後魏神龜造碑像記

歲月見本文

右神龜造碑像記魏神龜三年立余所集錄自隋以前

碑誌皆未嘗輒棄者以其時

集本無此字

有所取於其間也

然患其文辭鄙淺又多言浮屠然獨其

集本作以

字畫往往

工妙惟後魏北齊差劣而又字法多異不知其何從而

得之遂與諸家相戾亦意其夷狄昧於學問而所傳訛

繆爾然錄之以資廣覽也此碑字畫時時遒勁尤可嘉

也神龜孝明年號按魏書

集本有神龜二字

三年七月辛卯改

元正光而此碑是月十五日立不知辛卯是其月何日

也當俟治歷者推之嘉祐八年七月十一日書

右集本

東魏任城王造浮圖記

歲月見本文

右任城王造浮圖記不著其名云武定四年建武定東

魏孝靜年號也按後魏書景穆皇帝子雲雲子澄

集本有子

彘二

相襲為任城王其後國絕不封其去孝靜時差遠

不知武定四年王任城者為誰也治平元年八月八日

書

右真蹟

東魏造石像記

歲月見本文

右東魏造石像記其碑云大魏武定七年歲次己巳武定孝靜年號也今世所行歷譜惟龔穎運歷圖與今亳州宋退相紀年通譜為最詳而以穎所書推之武定七年歲當己巳與此碑合而武定止於八年是歲庚午東魏滅其事與東魏北齊書亦合而通譜以七年為戊辰八年為己巳又有九年為庚午而東魏滅按孝靜以後魏大統十六年滅是歲庚午則知宋公所記甲子不繆惟武定不當有九年而七年不得為戊辰此其失爾蓋

孝靜始即位改元天平盡四年而五年正月改為元象  
今通譜天平止於三年以四年為元象蓋自元象以後  
遞差一年故以武定七年為戊辰也苟不見斯碑則運  
歷圖與通譜二家得失其何以決

右集本

魏九級塔像銘

歲月見本文

真蹟

右魏九級塔像銘不見書撰人名氏蓋北齊時人所作  
也其年號見於文者三曰真君九年者後魏太武號也  
又曰武定四年者東魏孝靜號也又曰天保三年者北

齊文宣號也按高洋以後周大統十六年受東魏禪是  
歲庚午改元天保三年壬申此碑云歲在涸灘是矣碑  
文淺陋蓋鄙俚之人所為惟其字畫多異往往竒怪故  
錄之以備廣覽

集本有  
云字

治平元年三月二十三日書

北齊常山義七級碑

歲月見本文

右不著書撰人名氏文為聲偶頗竒怪而字畫亦佳往  
往有古法碑云常山太守六州大都督儀同三司綦連  
公以天保九年造浮圖天保齊文宣年號也北齊書有

綦連猛而不為常山大守都督儀同等官不知此所謂  
綦連公者何人也嘉祐八年九月二十日書

右真蹟

又

右常山義七級碑不著書撰人名氏文辭聲偶而甚恠  
書字頗有古法其碑首題云慕容儀同麴常山石氏諸  
邑義七級之碑其文云常山太守六州大都督儀同三  
司綦連公以天保九年為國敬造七級浮圖一區至天  
統中使持節都督瓜州諸軍事驃騎大將軍儀同三司

瓜州刺史常山太守六州大都督頻陽縣開國子樂平  
縣開國男慕容樂及散騎常侍郎驃騎大將軍前給事  
黃門侍郎繕州大中正食新市縣幹新除長山太守麴  
顯貴與功曹石子和等增成之蓋北齊時碑也慕容連公  
不見其名北齊有慕容連猛不為常山太守不知此何人  
而慕容樂官兼刺史太守並封兩縣不可詳也食縣幹  
入官銜蓋當時之制亦不可詳也義者衆成之名猶若  
今謂義井之類也

右集本

永樂十六角題

附出

右永樂十六角題名不著年月列名人甚多皆無顯者  
莫可考究不知為何時碑其字畫頗怪而不精似是東  
魏北齊人所書十六角者庸俗所造佛塔其後又書云  
造十六角鎮國大浮圖則知為塔矣其謂之十六角只  
見此碑而後魏時又有常山義七級碑蓋當時俚俗語  
類皆如此治平元年八月八日書

右真蹟

魯孔子廟碑

附出

興和三年

右魯孔子廟碑後魏北齊時書多若此筆畫不甚佳然亦不俗而往往相類疑其一時所尚

集本作傳

當自有法又

其點畫多異故錄之以備廣覽

右真蹟

北齊石浮圖記

歲月見本文

右齊造石浮圖記云河清二年歲在癸未河清北齊高湛年號也碑文鄙俚而鐫刻訛繆時時字有完者筆畫清婉可喜故錄之又其前列題名甚多而名特竒怪如馮戢郎馮貴買之類皆莫曉其義若名野又伽耶者蓋

出於浮圖爾自胡夷亂華以來中國人名如此者多矣  
最後有馮黑太者予謂太亦音捷意隋末有劉黑闥吳  
黑闥皆以此為名者太闥轉寫不同爾然隋去北齊不  
遠不知黑闥為何等語也

右集本

後周大象碑

大象三年

右周大象碑宇文氏之事迹無足采者惟其字畫不俗  
亦有取焉翫物以忘憂者惟怪竒變態真偽相雜使覽  
者自擇則可以忘倦焉故余於集古所錄者博嘉祐八

年六月二日書

右真蹟

文忠集卷一百三十七

欽定四庫全書

文忠集卷一百三十八

宋 歐陽修 撰

集古錄跋尾五

隋老子廟碑 開皇二年

右老子廟碑隋薛道衡撰道衡文體卑弱然名重當時  
余所取者特其字畫近古故錄之唐人

二字集本作其碑後所題唐人

姓名字皆不俗亦可准也 古真蹟

隋介朱敞碑

開皇五年

右介朱敞碑敞者榮從弟彥伯之子也按敞傳云字乾羅而此碑字天羅傳云為金州總管而碑又為徐州總管碑文雖殘闕然斑斑尚可讀其述徐州事頗多事為史家不取可也不書其官蓋闕繆也其字不同亦當以碑為是余於集錄正前史之闕繆者多矣治平元年二

月十六日書

右真蹟

隋龍藏寺碑

開皇六年

右齊開府長兼行參軍九門張公禮撰不著書人名氏  
字畫道勁有歐虞之體隋開皇六年建在今鎮州碑云  
太師上柱國大威公之世子左威衛將軍上開府儀同  
三司使持節恒州諸軍事恒州刺史鄂國公金城王孝  
僊奉勅勸獎州人一萬共造此寺其述孝僊云世業重  
於金張器識逾於許郭然北齊周隋諸史不見其父子  
名氏不詳何人也

右集本

又開皇六年

右隋龍藏寺碑齊張公禮撰龍藏集本無此二字寺已廢此碑

今在常山府署之集本無此二字門書字頗佳第不見其人姓

名爾碑以隋開皇六年立後題二字集本作而張公禮猶稱齊

按周武帝建德六年虜齊幼主高恒齊遂滅後四年

隋建開皇之號至六年齊滅蓋集本有已字十年矣集本有不知二

字公禮尚稱齊官集本無此字何也嘉祐八年九月廿九日

書右真蹟

隋太平寺碑開皇元年

右太平寺碑不著書撰人名氏南北文章至於陳隋其  
弊極矣以唐太宗之致治幾乎三王之盛獨於文章不  
能少變其體豈其積習之勢其來也遠非久而衆勝之  
則不可以驟革耶是以羣賢奮力墾闢芟除至於元和  
然後蕪穢蕩平嘉禾秀草爭出而葩華蕤實爛然在  
目矣此碑在隋尤為文字淺陋者疑其俚巷庸人所為  
然視其字畫又非常俗所能蓋當時流弊以為文章止  
此為佳美文辭既爾無取而浮屠固吾儕所貶

集本  
作鄙所

以錄於此者第不忍棄其書爾治平元年三月十六日

書右真蹟

隋李康清德頌

開皇十一年

右李康清德頌不著書撰人名氏文為聲偶而字畫奇古可愛康隴西狄道人也其碑首題云大隋冠軍將軍大中帥都督恒州九門縣令隴西李君清德之頌予在河北時遣人於廢九門縣城中得此碑字多訛闕其後題十一年歲在辛亥大將軍在酉二月癸丑朔十二日

甲子建年上有二字訛闕不可識按隋書開皇十一年歲在辛亥其二字乃開皇也大將軍在酉之說出於陰陽家前史不載而此碑見之

右集本

隋梁洋德政碑

開皇十一年

右隋梁洋德政碑在今蔡州新息縣隋開皇十一年行參

軍事

四字集本  
作參軍

裴玉與州人為息州刺史梁洋建寶塔

表德政碑按隋書志後周於新息縣置州至大業中州

廢也

右真蹟

隋韓擒虎碑

開皇十五年

右韓擒虎碑不著書撰人名氏而以隋高祖為今上乃  
隋人所撰碑文屢言虎字獨於名下去之若避唐諱此  
不可知也今以碑文考隋書列傳其家世官勲大畧多  
同惟其在齊為河長防主大都督車騎大將軍開府儀  
同三司白起防主轉洪起防主傳皆無之又遷和州刺  
史而傳為利州皆史官之闕誤當以碑為是而傳載闕  
羅王事甚怪而碑無之使其實有碑不宜

集本  
作應

不書以

此見史家之妄也治平元年六月十日書

右真蹟

隋陳茂碑

開皇十八年

右陳茂碑不著書撰人名氏而字畫精勁可喜隋書列傳載茂事尤多闕繆傳云高祖為隋國公引為寮佐及受禪拜給事黃門侍郎在官十餘年轉益州總管司馬遷太府卿後數載卒而碑歷敘為高祖寮佐時官傳雖不書可也其自為黃門侍郎後又為行軍元帥長孫覽司馬又為蜀王府長史太僕卿判黃門侍郎上開府儀

同三司梁州刺史等官史氏皆不書蓋其闕也又據碑  
茂為蜀王長史而傳為益州總管司馬碑為太僕卿而  
傳云太府皆史家之繆也碑云茂字延茂史亦闕治平  
甲辰秋社日書

右真蹟

隋蒙州普光寺碑

仁壽元年

右蒙州普光寺碑蒙州者漢南陽郡之育陽縣也應劭  
曰育水出弘農盧氏南入於沔故後人於育加水為消  
陽西魏置蒙州隋仁壽中改為消州又為消陽郡唐為

縣屬金州碑仁壽元年建猶曰蒙州既而遂改涪州矣

碑無書撰人名氏而筆畫道美翫之亡

集本作志

倦蓋開皇

仁壽以來碑碣字書多妙而往往不著名氏惟丁道護所書常自著之然碑石在者尤少余每與蔡君謨惜之自大業已後率更與虞世南書始盛既接於唐遂大顯矣治平元年正月七日書

右真蹟

隋丁道護啟法寺碑

仁壽二年

此書兼後魏遺法與楊家本微異隋唐之交善書者

衆皆出一法道護所得最多楊本開皇六年去此十七年書當益老亦稍縱也甲辰治平初月十日莆陽蔡襄記

右啟法寺碑丁道護書蔡君謨博學君子也於書尤稱精鑒余所藏書未有不經其品目者其謂道護所書如此隋之晚年書學尤盛吾家率更與虞世南皆當時人也後顯於唐遂為絕筆余所集錄開皇仁壽大業時碑頗多其筆畫率皆精勁而往往不著名氏每執卷惘然

為之歎息惟道護能自著之然碑刻在者尤少余家集  
錄千卷止有此爾有太學官楊褒者喜收書畫獨得其  
所書興國寺碑是梁正明中人所藏君謨所謂楊家本  
者是也欲求其本而不知碑所在然不難得則不足為  
佳物古人亦云百不為多一不為少者正謂此也治平  
元年立春後一日太廟齋宮書

右真蹟

隋鉗耳君清德頌

大業六年

右不著書撰人名氏其碑首題云大隋恒山郡九門縣

令鉗耳君清德之頌大業六年建字畫有非歐虞之學不能至也碑云君名文徹華陰朝邑人也本周王子晉之後避地西戎世為君長因以地為姓曾祖靜仕魏為馮翊太守祖朗成集二州刺史父康周荆安寧鄧四州總管別駕安陸龍門二郡守而前史皆不載碑在今廢九門縣中余為河北轉運使時求得之

右集本

隋廬山西林道場碑

大業十三年

右廬山西林道場碑渤海公煥公為隋太常博士時作

不著書人名氏而字法老勁疑公之書也西林道場者  
偽趙將竺氏捨俗出家名曇現始居於此晉太和二年  
光祿卿陶範始為現弟子慧永造寺而號西林按兩京  
記隋嘗更名佛寺為道場此碑大業十三年建也顏魯  
公寓題碑陰百餘字尤奇偉今附於碑後

右集本

又

右西林道場碑渤海公撰公在隋為太常博士時作不  
著書人名氏字畫道勁世或以為公自書公時年尚少

又字法與公書不同不知何人書也按

集木有韋  
述二字

兩京

記隋改佛寺為道場此碑大業中建故謂之道場也

右真

蹟

唐孔子廟堂碑

武德九年

右孔子廟堂碑虞世南撰并書余為童兒時嘗得此碑以學書當時刻畫完好後二十餘年復得斯本則殘缺如此

二字集  
本作矣

因感夫物之終與雖金石之堅不能以自

久於是始欲集錄前世之遺文而歲之殆

集本  
作速

今益十

有八年而得千卷可謂富哉嘉祐八年九月二十九日

書

右真蹟

千文後虞世南書

歲月未詳

右虞世南所書言不成文乃信筆偶然爾其字畫精妙平生所書碑刻多矣皆莫及也豈矜持與不用意便有

優劣耶

集本作也

熙寧辛亥續書

右真蹟

唐德州長壽寺舍利碑

武德六年

右德州長壽寺舍利碑不著書撰人名氏碑武德中建

而所述乃隋事也其事迹文辭皆無取獨錄其書爾余  
屢歎文章至陳隋不勝其弊而怪唐家能臻致治之盛  
而不能遽革文弊以為積習成俗難於驟變及讀斯碑  
有云浮雲共嶺松張蓋明月與巖桂分叢迺知王勃云  
落霞與孤鶩齊飛秋水共長天一色當時士無賢愚以  
為警絕豈非其餘習乎

唐幽州昭仁寺碑

貞觀三年

右昭仁寺碑在幽州唐太宗與薛舉戰處也唐自起義

與羣雄戰處後皆建佛寺云為陣亡士薦福湯武之敗  
桀紂殺人固亦多矣而商周享國各集本數百年其荷  
天之祐者以其心存大公為民除害也唐之建寺外雖  
託為戰亡之士其實自贖殺人之咎爾其撥亂開基有  
足壯者乃區區於此不亦陋哉碑文朱子奢撰而不著  
書人名氏字畫甚工此余所以錄也治平甲辰秋分後一

日書 右真蹟

唐呂州普濟寺碑

貞觀二年許敬宗撰

右呂州普濟寺碑呂州者霍邑也唐高祖義兵起太原始破宋老生於此義寧元年乃以霍邑趙城汾西靈石四縣置霍山郡武德元年更曰呂州太宗十七年遂廢也

右集本

唐衛國公李靖碑

顯慶三年當載於後同是許敬宗撰附此

右李靖碑許敬宗撰唐初承陳隋文章衰弊之時作者務以浮巧為工故多失其事實不若史傳為詳惟其官封頗備史云為撫慰使而碑云安撫使其義無異而後

世命官多襲古號蓋靖時未嘗有撫慰使也由是言之不可不正又靖為刑部尚書時以本官行太子左衛率其封衛國公也授濮州刺史蓋太宗以功臣為世襲刺史後雖不行皆史宜書

集本有而不書者闕也六字

其餘畧之可也

故聊志之治平元年三月二十二日書

右真蹟

唐顏師古等慈寺碑

貞觀二年

右等慈寺碑顏師古撰其寺在鄭州汜水唐太宗破王世充竇建德乃於其戰處建寺云為陣亡士薦福唐初

用兵破賊處多大抵皆造寺自古創業之君其英豪智畧有非常人可及者矣至其卓然信道而知義則非積學誠明之士不能到也太宗英雄智識不世之主而牽

惑習俗之弊猶崇信浮屠豈以其言浩博無窮而好盡

物理為可喜耶蓋自古文姦言以惑聽者雖聰明之主

或不能免也惟其可喜乃能惑人故余於

集本有其字

本紀

譏其牽於多愛者謂此也治平元年清明後一日書

右真

蹟

隋郎茂碑

貞觀五年

右隋郎茂碑李百藥撰其弟穎亦有碑在今鎮府北大墓林中余為都轉運使時得之隋書列傳言茂卒於京師此碑云從幸江都而卒史氏之繆當以碑為正

右集本

又

碑在大墓林中余為都運使時得之殆今蓋二十年矣嘉祐八年三月二十二日上御延和放進士許將等及第明日歇泊假閒閱遂書隋書列傳言茂卒於京師此

碑云從幸江都而卒史氏之謬當以碑為正焉 右真蹟

唐郎穎碑 貞觀五年

右唐郎穎碑李百藥撰宋才書字畫甚偉穎父名基字

世業而李百藥書穎世次但云父世業又書穎兄茂碑

亦然考其碑文有皇基締構之言則基字當時公私無

所諱避而於書世次 四字集本作百藥書穎父 字而不名不詳其義

也是以君子貴乎博學 集本有穎事唐為大理卿隋唐之時屢定律令益法吏也一十

字 九 嘉祐八年九月二十四日書 右真蹟

唐郎穎碑陰題名

歲月未詳

右郎穎碑陰題名柱國府僚佐三十二人常山公府國  
官一百七人合一百三十九人為一卷柱國府長史司  
馬掾屬各一人諮議記室司倉司功司戶司兵司鎧司  
法司田司士參軍事各一人又有參軍事五行參軍  
十人典籤三人常山國官國令大農各一人常侍侍郎  
國尉各二人典衛六人舍人四人城局廟長學官各一  
人食官廩牧各四人典府長一人典府丞二人親事七

十五人頽以貞觀四年卒此蓋唐制也

右集本

唐九成宮醴泉銘

貞觀六年

右九成宮醴泉銘唐秘書監魏徵撰歐陽率更書九成宮即隋仁壽宮也太宗避暑於宮中而乏水以杖卓地得水而甘因名醴泉焉

右集本

唐歐陽率更臨帖

歲月未詳同是率更書附此

右率更臨帖吾家率更蘭臺世有清德其筆法精妙迺其餘事豈止士人模楷雖海外夷狄皆知為貴而後裔

所宜勉旃庶幾不殞其美也

右真蹟

唐岑文本三龕記

貞觀十五年

右三龕記唐兼中書侍郎岑文本撰起居郎褚遂良書  
字畫尤奇偉在河南龍門山山夾伊水東西可愛俗謂  
其東曰香山其西曰龍門龍門山壁間鑿石為佛像大  
小數百多後魏及唐時所造惟此三龕像最大乃魏王

泰為長孫皇后造也

右集本

唐孟法師碑

貞觀十六年

右孟法師碑唐岑文本撰褚遂良書法師名靜素江夏安陸人也少而好道誓志不嫁隋文帝居之京師至德宮至唐太宗十二年卒年九十七

右集本

唐皇甫忠碑

貞觀十四年

右皇甫忠碑著作佐郎李儼撰忠為秦州龍門令歲滿縣民前左勳衛裴公隱等一千三百人申省請留八座報云公等請來遲晚縣令今已替訖好人堪用縣國共須豈一縣士庶獨懷悒

或作悒

惜所請不允忠以唐太宗

時為令當時臺省文字如此可愛秦州者義寧元年以  
河中之汾陰龍門置治汾陰武德二年徙治龍門太宗  
十七年州廢今碑後列縣人姓名有錄事鄉長鄉老里  
正縣博士助教佐史等今之縣吏惟錄事里正其名在

爾

右集本

唐辦法師碑

顯慶三年當載於後  
同是李儼撰附此

右辦法師碑李儼撰薛純陀書純陀唐太宗時人

集本  
有也

字其書有筆法其道勁精悍不減吾家蘭臺意其當時

必為知名士而今世人無知者然其所書亦不傳於後世  
余家集錄可謂博矣所得純院書祇此而已知其所書必  
不止此而已也蓋其不幸湮沉泯滅非余偶錄得之則遂  
不見於世矣迺知士有負絕學高世之名而不幸不傳於  
後者可勝數哉可勝歎哉治平元年閏五月晦日書

右真蹟

唐孔穎達碑

貞觀二十二年

右孔穎達碑于志寧撰其文磨滅然尚可讀今以其可  
見者質於唐書列傳傳所闕者不載穎達卒時年壽其

與魏鄭公奉勅共修隋書亦不著又其字不同傳云字仲達碑云字冲遠碑字多殘缺惟其名字特完可以正傳之謬不疑以冲遠為仲達以此知文字轉易失其真者何可勝數幸而因余集錄所得以正其訛舛者亦不為少也乃知余家所藏非徒玩好而已其益豈不博哉

集本無此六字

治平元年端午日書

右真蹟

唐薛稷書

貞觀永徽之間

薛稷書刻石者余家集錄頗多與墨蹟互有不同唐世

顏柳諸家刻石者字體時時不類謂由摹刻人有工拙  
昨日見楊褒家所藏薛稷書君謨以為不類信矣凡世  
人於事不可一槩有知而好者有好而不知者有不好  
而不知者有不好而能知者褒於書畫好而不知者也  
畫之為物尤難識其精粗真偽非一言可達得者各以  
其意披圖所賞未必是秉筆之意也昔梅聖俞作詩獨  
以吾為知音吾亦自謂舉世之人知梅詩者莫吾若也  
吾嘗問渠最得意處渠誦數句皆非吾賞者以此知披

圖所賞未必得秉筆之人本意也

右集本

唐益州學館廟堂記

永徽元年顏有意書

高朕之名於義不安頗疑有意得於古碑之訛缺爾存之以俟博學者

右集本

唐徐元禮碑

咸亨三年

右徐元禮碑崔行功撰趙仙客書元禮唐高祖子也以碑考傳年壽官闕悉同而碑云使持節徐譙泗三州諸軍事徐州刺史又云贈太尉使持節大都督冀相

滄德棣魏博等八州諸軍事冀州刺史傳云為徐州都督又云贈冀州大都督傳既簡略又都無法而碑之所書亦失也蓋刺史非兼州之官都督非一州之號碑云持節徐譙泗三州諸軍而傳獨為徐一州刺史此其失也當如前史持節秦涼州諸軍事秦涼二州刺史乃為得爾其書贈官則如碑之書是矣蓋為一州刺史而兼督八州軍

集本有州字

事爾都者有所兼總之名也此特小

故而余區區辨之者前史失之久矣又國朝自削方鎮

之權而節度使都督無復兼州而舊名不除是節度都督自施於已此不可不正其失也治平甲辰中元日書

右真蹟

唐龍興宮碧落碑

咸亨元年

右碧落碑在絳州龍興宮宮有碧落尊像篆文刻其背故世傳為碧落碑據李璿之以為陳惟玉書李漢以為黃公譔書莫知孰是洛中紀異云碑文成而未刻有二道士來集本無此字請刻之閉戶三日不聞人聲人怪而破

戶有二白鴿飛去而篆刻宛然此說尤怪世多不信也  
碑文言有唐五十三祀龍集敦牂乃高宗總章三年歲  
在庚午也又云哀子李訓誼謨甚為妣妃造石像按唐  
書韓王元嘉有子訓誼謨而無甚又有幼子訥元嘉以  
則天垂拱四年見殺在總章三年

集本有立  
碑二字

後十八年

集本有  
史字

有子訥不足怪而不應無甚蓋史官之闕也嘉

祐八年十月四日書

右真蹟

唐智乘寺碑

咸亨四年

右智乘寺禪院

集本有碑字

者唐鄭惠王所作也惠王名元

懿高祖第十三子也有子十人列於碑後而第五子樂

陵公闕其名按唐書宗室世系表

集本作譜

樂陵公名球不

知

集本有碑字

何為獨闕也今唐書元表以嗣王敬為璪樂

平公珪為樂安公新平公璲為遂三者皆史家之失當

以碑為正世系譜牒歲久傳失尤難考正而碑碣皆當

時所刻理不得差故集古所錄於前人世次是正頗多

也治平元年清明前一日書

右真蹟

唐吳廣碑

總章二年

右吳廣碑不著書撰人名氏而字畫精勁可喜廣字黑闥唐初與程知節秦叔寶等俱從太宗征伐後與殺建成有功至高宗時為洪州都督以卒然唐書不見其名氏惟會要列陪葬昭陵人有洪州刺史吳黑闥亦不知其名廣也其名字事蹟幸見於後世者以有斯碑也碑字稍磨滅世亦罕見獨余集錄得之遂以傳者以其筆畫之工也故余嘗為蔡君謨言書雖學者之餘事而有助

於金石之傳者以此也治平元年八月八日書

右真蹟

唐九門縣西浮圖碑

上元三年

右九門縣西浮圖碑唐應詔四科舉董行思文清河傅德節書題云九門縣合鄉城人等為國建浮圖之碑浮圖在智矩寺中寺今亦廢碑上元三年建按唐有兩上元此碑云歲在丙子乃高宗上元三年也肅宗上元三年歲在壬寅爾

右集本

唐陶雲德政碑

永淳三年

右唐中州錄事張義感撰雲字夫舉河南伊闕人也高宗時為恒州刺史碑永淳三年立予為河北轉運使至真定府見碑仆在府門外半埋地中命工掘出立於廡下字為行書筆蹟道麗而不著書者姓名惜哉右真蹟

隋汎愛寺碑

大業五年

誤置此

李百藥

集本作樂下同

字僅存其下磨滅而書字猶可辨疑此

碑百藥自書字畫老勁可喜秋暑鬱然覽之可以忘勸

治平丙午孟饗攝事齋宮書南譙醉翁六一居士

右真蹟



文忠集卷一百三十八